

Como glotta

OFFICIAL REVUE MENSUEL DEL OCCIDENTAL-Union

CONSACRAT AL
DEVELOPATION,
PROPAGANDA E
APPLICATION DE

LINGUE INTERNATIONALE OCCIDENT

Annu VIII

April 1929

Nr 59 (4)

Redaction e Administration:
Mauer b. Wien (Austria)
Redactor: Ing. E. Pigal

Collaboratores redactional:

Dr. Aschwanden (Biel), Prof. R. Berger (Morges), E. Biddle (Chester), Dir. G. Bohin (Strasbourg), A. Deminger (Wien), L. M. de Guesnet (Paris), A. Haldin (Eskilstuna), J. Honti (Budapest), Ing. J. R. Hoerbiger (Mauer b. Wien), F. Houdek (Wien), K. Janotta (Kaltenleutgeben), J. A. Kajš (Brno), F. Lagnel (Chapelle), Reg.-Rat Dr. Mell (Rudolstadt), E. Moess (Wien), G. A. Moore (London), Dr. H. Nidecker (Basel), M. den Outer (Rotterdam), Prof. H. Pášma (Tábor), Dr. A. Peipers (Köln), J. Prorók (Leipzig), Mag. A. Z. Ramstedt (Helsingfors), Mag. R. Rehn (Helsingfors), Dr. K. Schüppel (Parchim), Dr. C. E. Sjöstedt (Uppsala), D. Szilágyi (Budapest), E. de Wahl (Tallinn-Reval), A. Wästerland (Berlin), Dr.-Ing. A. Wormser (Offenbach am Main).

Contene: Stabilità e progress, de E. de Wahl, pg. 61. - Nor problemas, de E. Biddle, pg. 64. - Basic, de J. Prorók, pg. 67. - Adjectiv Final -I, de E. de Wahl, pg. 70. - Chronica, pg. 71. - Du necrologs (J. F. Khun e H. Senigallia), pg. 77. - LITTERATURA: Mi amic Kakut, de Th. Mallet, pg. 78. - Cremation de prince sur Ball, de H. H. Juynboll, pg. 80. - Få sam quam li postmann, de L. M. de G., pg. 82. - Correspondentie, pg. 83. - Lettre apert, pg. 84. - Subventiones, pg. 84.



COSMOGLOTTA

Official revue international mensuel del Occidental-Union

(Organisation Universal de Lingue International Occidental)

Consacrat al developation, propaganda e application de Occidental.

Scientific e litterari. Redactet in Occidental.

Redaction e Administration: Postfach 10, Mauer bei Wien, Austria.

Abonnement: 7 ö. S = 1 doll. = 5,2 sv. fr. = 4,2 RM = 33 Kč.

Chec-Contos Postal: Austria: Nr. B-125.211 Sparkasse Mauer b. W.

Conto 3137; Germania: Köln 7831 Dr. A. Peipers; Francia: Paris

264-37 L. M. de Quesnet; Svissia: II. 1969 F. Lagnel, Chapelle (Vd).

Tchecoslovacia: 29.428 Praha, Milan Nedvídek, knihtiskárna, Tábor.

OCCIDENTAL-UNION

ORGANISATION UNIVERSAL DE LINGUE INTERNATIONAL OCCIDENTAL

Protectores

Dr. J. Baudouin de Courtenay, Professor de Linguistica, Universitate de Warszawa, Polonia.

Dr. Albert Guérard, Professor de Litteratura General e Comparat, Universitate de Stanford, California, USA.

Dr. Albert Saareste, Professor de Litteratura, Universitate de Tartu (Dorpat), Estonia.

Representantes

Austria: Cosmoglotta, Postfach 10, Mauer b. Wien.

Britannia: The British Occidental Society, 18, Meadows L., Chester.

Gerald A. Moore, 32 Cleveland Square, London W 2.

Central America: M. Palomares, Santiago de Puriscal, Costa Rica.

Dania: Jan Casse, Willemoesgade 23, Köbenhavn.

Estonia: Kosmoglott, Eha 10, Tallinn (Reval).

Finland: Société Interlinguistic, Villagatan 25, Helsingfors.

Francia: Occidental-Burò, 83, rue Rochechouart, Paris 9.

Ing. Thibault, 15, rue de la Madeleine, Angers.

G. Bohin, Director, Ecole Moderne, 14, Wimpfeling, Strasbourg.

Germania: Dr. A. Peipers, Am Römerturm 13, Köln.

Dr. Karl Schüppel, Buchholzallee 36, Parchim, Mecklbg.

Reg.-Rat Dr. Mell, Schwarzburgstr. 60, Rudolstadt, Thür.

Holland: Occidental Gruppe Nederlandan, Maaskade 142B, Rotterdam.

Hungaria: Dénes Szilágyi, Damjanich-u. 28/a, I., Budapest 7.

Comte Ernest Zichy, Ács, Komárom vm.

S. H. S.: Ivan Ločnikar, Selnica ob Dravi pri Mariboru, Slovenia.

Svedia: Svenska Occidental-Förbundet, O. Agatan 37, Uppsala.

Albert Haldin, Kungsgatan 25, Eskilstuna.

Svissia: Sviss Association por Occidental (S. A. P. O.), Chapelle, Vaud.

Prof. Ric. Berger, Morges, Vaud.

Tchecoslovacia: J. A. Kajš, Vranovská 44, Brno.

U. S. A.: The Ferguson Press, 125 E. Chestnut St., Jeffersonville, Ind.

COSMOGLOTTA

Annu VIII

April 1929

Nr 59 (4)

STABILITÁ E PROGRESS

It es conosset que chascun lingue continualmen changea-se e evolue secun propri leyes queles retrospectivmen on constata quam causal, ma ne posse previder in su detal'es. Ci effecte du causes. Li unesim, li conservativ, es li acostomation, li commoditá del conosset, e li duesim, li innovativ, es li necessitá adaptar se al nov conditiones del circumantie, del changeant vive.

In general on posse dir que in nor civilisat hodial lingues li forties conservativ es infinitmen plu grand quam li reformatori, dissidentie. E to proportional al radio del action del lingue e del intern trafic e communication. On save que in contrari li dialectes de brasilian tribes sovente in tri generationes muta-se talmen que ili ja es inreconossibil pos 60 annus. Li modern frances lingue es enormmen plu stabil, quam ti ante 500 annus, u it posset evoluer in chascun angul ye propri maniere, e just talmen per isolation ab altris ha format-se in li medievie li modern romanic lingues ex li general commun latin. Plu un lingue es expandet territorialmen, plu it deve esser conservativ, si it ne vole discader in different dialectes. Per quo nu es atin'et un tal conservatisme in nor grand lingues? On posse dir: per un grand idé e su incarnation. In Germania p. ex. li conservativ e centralisant fortie esset li traduction del biblie per Luther. In Anglia li efficientie del titanic talente de Shakespeare. In Francia li preponderantie exclusiv de Paris e su societé, in Russia li politic e geografic unitá e li migration constant de su elementes etc.

It es self-evident que por un lingue international un ancor plu grand stabilitá es necessari, si pos quelc annus it ne vole perder su sense de un lingue international. Ma durantque li lingues national ja just por lor usation constant in li omnidiari vive possede in ti acostomation li grandissim cause de su stabilitá, just ti momente in un L. I. have tre poc fortie, e spe-

cialmen in li comensa de un movement interlinguistic, quando li usation del lingue es solmen accessori e sovente influentiat del matrin lingue del usator. Quando va har format-se un firm solid usagie per sovent e constant usation, quando li form del lingue va esser in li mente del popules presc sam acostumat quam li lingue matrin, tande li form e li stabilitá del existentie e vivi-capabilitá va esser assecurat. Ma til que to eveni, ti securitá ne es cert, e deve esser consolidat per omni maniere si li idé ne deve far fiasco.

Ci denove noi posse vider li genial sentimente por lu practic, vital, quel guidat Zamenhof che li stabilisation de Esperanto in li tam mult attaccat e denigrat «fundamento». Ti fundamento ha dat a Esperanto li possibilitá de viver e evoluer in un uniformitá admirabil, talmen que nu on ja posse constatar in li congresses un standard-Esperanto, parlat del firm esperantistes e che quel on ja ne posse plu distin'er a quel nation appartene li orator. Li migrant annual congresses auxilia un tal stabilisation e uniformisation del lingue.

Ma qualmen it esset possibil fortiar tant divers persones a discipline sub ti arbitrari «fundamento»? To esset 1) li fascinant «interna ideo del rondo familia» e 2) li vermen genial tactica de su ductores.

Solmen Schleyer, quel tamen ne havet tal fidel e self-sacrificant executores quam Zamenhof, posset con su idé «menade bal püki bal» (a un homanité un lingue) e dictatoric prescriptiones ducer su Volapük a incomprensibil altore e expansion. Li evolutionistic e reformatori tendenties de su auxiliatores Kerkhoff, Bauer e poy Rosenberger sub influentie del nov apparit Esperanto ductet li fier construction a rapid ruina.

Un systema ancor tene se sufficient fortmen in un constant statu. To es Latino sine flexione de Prof. Peano. Anc ci noi vide un clar **stabil cadre**: li classic latin amputat secun clar definit principies; e li **idé**: del fortie del classic cultura, representat per latin. Advere per su cadre it restricte se a un micri circul de persones (latinistes-scientistes) e un micri circul de idées (ne surtient del complex de conceptiones de antiqui Roma e abstract scientie), ma in ti cadre it posse viver tre solidmen just pro su clar fundamente e idé.

Omni altri systemas fallit per ne posser dar un idé e un stabilitá.

Specialmen Ido, self un product de intern revolution in Esperanto, ne posset tener li brides e frenar li tendenties sub-

versiv, finient in un patologic reform-manie distractiv e incoherent. Li vanitativ assertion, que Ido ne es li producte de un hom, ma de un collectivité, es li index de su incoherentie intern. Pos li morte subit de su dictator Couturat anc li decretet «stabiles» ne posset plu salvar Ido de su fate. Anc sin apparition de Occidental it devet un die ducer se self ad absurd(um).

Quo noi posse nu aprender de ti lecciones del historie de interlinguistica?

It es evident: Un lingue international, e specialmen in statu de nascentie, besona un firm fundamente, clar e usabil, e un discipline del adherentes, max bon atin'et per un entusiasmant idé. Che Schleyer e Zamenhof li adoration del mastro e li humanitaristic pacifistic idé causat ti discipline. Ma it vell esser incaut creder tal causes quam effectiv anc hodie pos li mund-guerre, in li tempore de suspicion, odie, nervosité, lucta de classes, proletarianisation e misere de populmasses e del intelligentie, follies del nov riches, parisan «folies bergeres», Tiller girls -- li quasi dansa sur li gron'ant vulcan -- li menaciant revolution e bolshevism; e de altri latere un transcendent pacifism, religiosi moventies, spiritism, teosofie, Baháism, Krishna Murti, Oomoto etc, etc.

Quel stabil fundament e quel grand idé va esser sufficient fort por posser ducer nor lingue al victorie?

In li actual democratic tempore solmen democratic e rational idées posse dar nos ti stabilitá desirat. In li lingual systema ne plu discipline al parol del mastro, ma clar natural coherentie international per ja existent communitá de radicas, suffixes paroles e manieres de expression commun a nor occidental civilisation. Ti fundamente basant sur accustomation, illuminat per li tralucid, transparent etymologic connexe e li simplic regulari grammatica es li til nu max fort possibil fundamente por un commun lingue international; ma por posser efficer, it deve esser supportat de un commun volentie, del conviction de nor commun europian civilisation e cultura, e del necessitá abolir li mures vertical inter li popules, e li horizontal inter li classes, por dar circulation al sangue del vive, ante quam li gangrena va infecter e invenenar li tot organisme. Es necessari un orden de paladines del europian civilisation.

U es un **vole**, ta es un **via**!

U es **un** vole, ta es **fortie**

U es vole **e** fortie, ta es victorie.

E. Wahl.

NOR PROBLEMAS

Inter li unesim problemas queles noi deve considerar es: qual gruppe o gruppes de homes va esser max attraet a nor movement. Nam it es tre cert que ne omni homes es interessat: vermen, solmen un micri percentage. Li affere es: trovar e atin'er ti micri númeres. Plu noi succede ye to, plu nor resultas va esser bon e nor expenses de pecunie e tēmpore va esser bass.

Ante omni-cos noi deve memorar que hodie nor movement ne es in li sam position quam ti de Esperanto. Esperanto ha atin'et un punctu in su expansion u it ha posset divider se in du separat movementes — li un neutral, l' altri socialistic (ne, quam on di quelevez, communistic solmen). On ha ja audit parlar pri altri divisiones — apart Catholic movement, per exemple. Ti fenomen es natural e inevitabil quande un L. I. ha inradicat se til un sufficient gradu. Eventualmen, lu sam va posser evenir che Occidental, nam un lingue international, quam omni lingue national, es usat del max divers persones e por li max divers e contraditori scopes. To es inevitabil. Ti ci constation monstra tre clarmen que it es absurd refusar Esperanto simplicmen proque li Sovet-guvernament supporta it til un cert gradu. Si Occidental vell har esset in li position de Esperanto, tande sin dúbita li russes vell har protectet Occidental. Ili electet Esperanto proque ti lingue esset li sol «in practic usada».

Comprensibilmen li punctu de vision de (p. ex.) sr J. Prorók que li luctada inter Esperanto e Occidental es un luctada inter barbarisation e conservation de nor cultura, es un tut altri affere. Ma on sovente exagera l'importantie del Latin formes, quasi si nul cultura vell posser exister exter les. Yo confesse que yo vide poc in li European cultura del ultim 1900 annus quel es tam remarcabilmen preciosi. To quo es max visibil es tyrannie, oppression, guerres e nigri superstition. Solmen in li ultim decennies li scientie ha levat nos super li nivelle del ancian civilisationes. It es cent vez plu important pensar pri li futur quam pri li mort passat. Tamen, li fact resta que pro practic rationes it es immensmen important conservar li conosset international formes, pro que: 1. talmen on fa li lingue mult plu facil a aprender, comprender e usar, ne solmen por erudites ma anc por li ordinari hom e 2. talmen on conserva inutilat li grand scientific-technic vocabularium ja

internationalmen conosset. Volente introducter un lingue international on deve unésimli far it attractiv al publica; si on ne fa to, on perdi su tēmpore.

Occidental, in su hodial position, besona union inter su partisanses. Noi ne es sufficient fort por posser haver pluri independent sectiones de nor movement, quam Esperanto. Lass nos obliviar nor differenties e lass nos combatter unit por gan'ar li victorie por nor bell idé. E lass nos tre clarmen accentuar li plen neutralitá de nor lingue coram li publica. Identificar Occidental con quelecune politic, social o religiosi tendentie, vell nulmen auxiliar nos e vell solmen far mal.

Lass nos concentrar nor propaganda che li ancor neutral publica e evitar conflictos con altri systemas, secun quant to es possibil. Lass nos evitar omni amaritá contra nor coidealistes qui prefere altri systemas. L'adversario de hodie va esser li fidel amico de deman. E lass nos evitar omni tendentie ridicular nor concurrent lingues. Parlar quasi si Esperanto, e Ido vell esser miserabil jargones apt solmen por infantes o negres de Central Africa: dir que lor derivat paroles es infantesc ludes apt solmen por amuser ineducat homes; tal metodes de combatte ne es solmen indigni de un seriosi movement, ma anc monstra un manca de comprehension pri li psychologie. Tal metodes de combatte simplicimen incolera l' Esperantistes e Idistes e fa omni conversion desfacil o impossibil.

Nor max fort punctu es li facile e sovente immediat comprensibilitá de Occidental por li educat West-Europano. To es un avantage quel on ne posse evaluar tro altmen. It es forsan li unic arma per quel noi va posser victor Esperanto. Certmen, sin it, noi vell haver tre poc chances.

Li persones inter queles noi va dever far nor propaganda es:

(a) **Scientistes e pedagogos** por queles Occidental posse haver un real e immediat utilitá. Un scientie libre scrit in Occidental es comprensibil de omni European e American scientistes, mem si tis nequande ha audit pri Occidental. Do, li publication de un tal libre es practic ja hodie in li unesim dies de nor lingue.

(b) **Commerciantes** — venditores e compratores exter li limites de un sol nation besona un lingue international, ma ne favora Esperanto o Ido. Occidental es strax utilisabil almen por Anglo-Latin landes pro su comprensibilitá.

(c) *Viajeros* — por commercie o plesur. Ma tis ci, qui besona li parlat lingue, ne va trovar tam inmediate profite. Nor Occidental-Union deve tam bentost quam possibil arrange un mundan systema simil al U. E. A. (Universala Esperanto-Asocio) por utilizar e developar li possibilitás de Occidental in ti direction.

(d) *Intellectuales* de omni specie, con interesses international. Ti ci grupe, por quel li lingue es til un cert gradu strax utilisabil, es tre important.

(e) *Pacifistes*, anti-militaristes, internationalistes, etc. Ti ci grupe, insufficient sol por conductor nor affere al victorie, es tamen de grandissim importantie, nam su membres va portar un grand entusiasme (quelevez, infelicimen, un poc fanatisat) quel es valorosissim in li propaganda. Li max mult del temporan Esperantistes appartenet a ti ci type e it es mersi a lor fidelitá e self-sacrificie que Esperanto es u it es hodie. Ad u tal entusiasme vell conductor un vermen acceptibil lingue international?

(f) *Socialistes*, etc. L'internationalisme inter socialistes de divers species cresce e besona un lingue international por su expression. Li exemple de Esperanto monstra tre clar-men que ci on have un grand camp por successosi propaganda. Occidental por li laboreros es plu facil quam Esperanto e ultra to it have li advantage apertier al proletario un comprehension del terminologie scientie e technic, quo Esperanto-Ido ne fa. Li assertion de cert ductores del Esperanto-laboreros que Occidental es un complicat, aristocratic lingue apt solmen por erudites e reactionarios, es un absurd e intentional mentie.

It ne existe alcun dubita que inter li laboreros on trova mult enthusiastic amicos del lingue international. Yo ha videt sufficient in li Esperanto-organisation S. A. T. (Sennacieca Asocio Tutmonda, to es: Anational Association Panmundan) por apreciar to.

It es inútil dir que noi ne vole que revolutionarios mey aprender un lingue international. Ili va far it ca vu vole it o ne. Ili do almen mey aprender un lingue quel va far lor cultura plu alt vice un idioma quel ne have tal effecte.

In nor propaganda hodie noi deve haver un sol devise: offertar nor lingue a omni qui vole accepter it e utilizar it, por egal qual scope. To es li sol metode possibil e practicabil.

Nor personal differenties e prejudices deve esser obliuiat pro li bon de nor affere. Quam ateist yo es un desamico del catolicos; quam individualist un inamico del communistes; ma in li Occidental movement yo es pret conlaborar con ambi e omni qui have li scope introducter un interlingue quel va auxiliar in li creation de un plu felici monde in li futur.

Eric Buddle

BASIC

British American Scientific International Comercial English

Mr. C. K. Ogden, li redactor del angles revue «Psyche» publica in unesim loc de su revue, nr 35, januar 1929, sub titul «The Universal Language» un essaye pri su idé de un adaptation del lingue angles quam international medie de intercomprehension, e anuncia un detal'at exposition de su systema. Il supposi que con 850 paroles il posse dir omni-cos necessari, anc in li scientie, diplomatie, comercie etc, in quel dominias existe ultra ti general paroles un stoc de technic terminos ja conosset a omni specialist in ti dominia. Ti 850 paroles consiste ex 400 nomines (substantives), 100 qualificatores (adjectives), 100 operadores, particules etc, 200 nomines de concret coses e 50 adjectivic opposites.

Lu nov es, que il elimina generalmen li verb e su conjugation (almen il pretende far to), e conserva solmen quelc fundamental verbal conceptiones, queles il nomina junt con particules etc «operatores». Per to il vole gan'ar un totalmen synthetic structura e trova que solmen li lingue angles es apt por un tal systema, tam plu que it in ti relation aproxima se al lingue chinesi.

Talmen li quintessentie de su idé es un sort de scientific constructet pidgin-english quel vell esser sufficient por posser intercomprender se sin grand desfacilitá con persones queles ja conosse angles. Secun li autor 1/4 del homanité ja parla angles (!).

Ti idé sembla tre ingenios por li Britic imperia, e por li communicationes inter li dominos angleses e li «other colonial people». It es solmen question, es-que un tal artificialmen povrisat angles (notabene con omni anglicismes in li limite

de ti 850 paroles)*) va esser un sufficient medie por li mental communication del altri civilisat european e asiatic nationes inter se. Esque un person conoscent solmen «Basic-english» va comprender p. ex. li deliberationes in un congress? Esque on va comprender un plu minu popular-scientific ovre scrit in «normal-english»? Esque por li «other people» it ne es necessari posser publicar grand gazetes, libres de max divers contenentie, far traductiones del productiones de arte del different nationes? Esque noi va dever contentar-nos con caricatur-english-reproduction de ili?

Yo ne crede que li non-angleses va accepter ti amabil invitation a plen, anc mental sclaverie. Si hodie ja li economic preponderantie del anglo-saxonic monde es evident, tam plu Europa continental quant possibil va resister a un total anc mental suprematie.

Si ja it vell esser necessari adopter un sort de Pidgin, tande forsan on vell plu facilmen consentir con Papiamentu, li creolic lingue de Curaçao, quel quam on asserite es li max facil natural lingue e posse expresser omni finesses del mente.

Ma nu li altri flanc. Noi mey supposir que li idé de Ogden cresce til realitá li tot mund non-angles parla su Basic-English. Quel influentie va haver ti corruptet angles ye li lingue de Shakespeare, Oscar Wilde, Shaw, Galsworthy? It posse esser solmen un continual poc a poc crescent barbarisation del angles. Es-que li autor del projecte ha fat se clar ti possibil e probabil effecte?

Tant pri lu general. Li execution de su idé li autor pensa sive per un folie sur quel es dat li 850 necessari paroles o un special apparatus con rotant discs sur li sam axe. Il ha reservat omni jures tam por li disposition de vocabularium de ti 850 paroles, quam por li mechanic apparatus, quel mey facilisar li aprension.

Noi mey nu regardar li linguistic latere. Secun li assertion del autor li verb es abolit o almen celat sub nomine «operator». In ti rubrica de su panoptic tabelle noi nu trova solmen li secuent verbes: come, get, give, go, keep, let, make, put, seem, take, be, do, have, may, will. Chascun qui conosce li quasi cameleonatri multiplicitá de sense p. ex. in «get, put,

*) p. ex. con tal subtil differenties quam «between» e «among», «every» e «each», «I go» e «I am going» etc, trovabil solmen in angles.

keep», va conceder que por non-angleses to ne va esser tro facil, tant plu que nu in Basic ti poc verbes va dever prender sur se un ancor plu extensiv role.

Advere mult verbes es ancor celat sub li form de substantives p. ex.: act, answer, care, cook, desire, fall, hope, print, sleep . . . etc.

Interessant nu es li application de ti «panoptic» parol-tabell, printat sur un pagin, in li practica, monstrat in un adaptation o translation de un angles articul pri un technic problema in «Basic». Regretabilmen li tema ne da possibilitás vider li application del preterit, yo ha trovat solmen li irregulari form «was» del verb «be», «would» de «will» etc. Per stran'i cause li verb «can, could» es totalmen absent in li tabelle, ma it appare in li texte. Nu yo fat un perlustration de un parte con 16 lineas. In ti spacie yo trovat li secuent fort anglicismes: come across, very start. Ultra to in li panoptic tabelle es absent li secuent paroles: across, (parallel), related, aware, difference, each, could (can), still. Existe li paroles «relation» e «different», ma ne «relate(d)», ni «difference». Proque un derivation ne es dat, samli ne grammatical explicationes del suprenominat conjugation-irregularitás, on deve qualificar ti paroles anc quam ne existent in li tabelle. In li resultate do, in li texte presentat del autor noi trovat in 16 lineas ja 7 paroles ne mentionat in li panoptic tabelle.

It sembla do que li assertet facilitá e sufficientie de 850 paroles es un erra.

Esque noi do nu deve qualificar ti project quam un del ephemeru apparitiones, ja in tant quantité submerget in li Lethe?

Yo vell qualificar it quam li max effectiv concurrent de un artificial lingue international, til nu propagat. Nam it contene sin dubita tre modern e attractiv qualitás. Per li concentration de omni verbal function sur quele poc quasi fundamental conceptiones nominat supra, e expresser omni altri verbes per medie de ti fundamentales con adjuntet substantives it sta in li general evolution del lingues. (p. ex. «go into», por «enter», «get off a ship» por «disembark»). Ti evolution just ha fat li creolic lingues. Ma anc li chinesi es in ti stadie de developament. Advere per su absolut rigid parol-ordine it corresponde al mill-annual statica del chinesi cultura.

Specialmen dangerousi por li introduction de un artificial lingue es un altri recent fact: li parlant film. Li american film-

directiones ne posse haver sufficient profit de lor production si ili ne have li necessari grand publica de usatores. Ili vell posser far propaganda por li barbarisat simplificat angles per lor filmes, grammofones e radio-cursus de «Basic» e it ne es excludet que ili posse haver success che li grand masses, por queles omni finesses es superflu, si on nu egarda li cultural nivel del american film-comedies queles ja ha invadet omni cinema-teatres, o li nu preferet filmes ex vive russian, queles have tant similitá con ver russes quant un pavian con Goethe.

Timeo Danaos et dona ferentes! *Julian Prorók.*

LINGUISTIC QUESTIONES

Adjectivic finale -i

Quele personas critica li adjectivic finale **i**, nomina it un esperantisme e postula su elimination. Ja mag. A. Z. Ramstedt in su articulo «Finale del adjectives» (Cosmoglossa, nr 48, pag. 76) ha monstrat que, si on vole introducter un adjectivic finale-suffix, it posse esser solmen **i**, quam li max international. In Occidental on mem posse regardar it quam quasi acurtat suffix **-ic**. It es anc clar que in li suffixes **-ari**, **-ori** it es absolut necessari 1) por distinction del suffixes **-ar** e **-or**, ma 2) anc pro li ulteriori derivation ad **-ario**, **-orio** etc. Sammen to es in **levi**, **brevi** etc ex queles on deriva **aleviar**, **abreviar** etc. E contra li usation del finale **i** quam characteristic suffix in tal casus probabilmen anc li adversarios ne va posser objeter. De facto lor critica e antipatie es tornat contra ti casus u ti **i** ne have suffixal valore, i. e. u on adjunte it a ja pur adjectivic radicas, p. ex. «boni», «clari», «grandi» etc. Specialmen chocat es li personas parlant italian, u ti **i** significa li plurale.

Advere on ne posse egardar li pretensiones de un sol populo, proque on sempre va trovar un lingue in quel alcun parolo o suffix va significar alquicos tut altri e mem contrari, por ex. in Esperanto e in sved li paroles «ni» e «vi» es just opposit. «zapomnil» in russ es «ha memorat» e in polones «ha obliviat» etc. Do ti circumstantie sol ne posse esser cause por elimination de **i**. Ma it es ver que in ti paroles li **i**, proque ne trovabil necu, sona e aspecte tre foren, e pro to choca divers personas. Ma just ci it ya totalmen ne es necessari. Li regules de Occidental tre clarmen dí que li usation del finale **i** del ad-

jectiv es absolutmen voluntari e nulnen obligativ, u it ne es postulat per li form del suffix o li necessitá distin'er it de un identic substantive, si posse eventer un miscomprehension. E pro to it tutmen ne es necessari usar ci ti finale. On posse tre bon usar ti paroles sin finale o on vell posser mem adjunter li general eufonic finale **e: bone, clare** etc. Ma quam ja dit lu max bon es dir **bon, clar** etc.

On posse mem consiliar ne abusar in tal casus li finale **i**, quel es foren a nor lingues. Til nu divers persones ha usat it tro sovente. E it nequande es desirabil chocar li publica, e specialmen si to es absolut evitabil secun li regules grammatical de Occidental.

Yo espera que ti declaration va sammen bon etablisser li tranquillitá, quam ye su tempore li permission omisser li auxiliare **ha** in li preterite ha ductet al syntetic preterite, con quel nu omnes es content.

L. Wahl.

CHRONICA

Li 5 februar evenit in Wien li triesim reunion general del Viennes Occidental-grupp COSMOGLOTTA. Pos acception del annual rapport presentat de sr Pigal on electe con unanimitá li secuent comité: president Karl Janotta, vicepresidentes Joh. Rob. Hoerbiger e Engelbert Pigal, secretario Eugen Moess, vicesecretario Alois Deminger, cassera Helena Pigal, bibliotecario Leopold Eckel. Pos li official parte del assemblé sr Janotta fat un discurs pri li «Problema de L. I. e su solution per Occidental» tractante inter altri-cos li intern structura de Occidental e su extern situation inter li concurrent angles e Esperanto. In consequentie del foundation del Occidental-Union destinat specialmen por international propaganda li viennes Societé Cosmoglotta nu concentra su activitá al local propaganda. Li membres decidet convenir al unesim mardi de omni mensu a clocca 19 in extra-chambre de Café Jacoberhof, Wien I., Liebenberggasse 1. Un apart joy e honore esset por li Societé li presentie de senioras Ernestine Günther e Sidonie Lott, filias de Julius Lott, li conosset propagandist de Volapük e precursor del scol naturalistic del L. I.

E. M.

In Malmö, Svedia, li local loge de NATIONALTEMPLAR-ORDEN arrangeat un discussion pri li mundilingual question li 18 januar. Al discussion esset invitat anc li membres del lo-

cal socialdemocratic yunité-club e representantes por Esperanto e Interlingua. Nor coidealist senior Eric Ahlström, qui es ancian esperantist e ductor de studie-circules in Esperanto, ma nu devoc su forties a un energie e effectiv propagande por Occidental, esset invitat quam introductor del discussion. In su discours il developat li principies e bon qualitäts de Occidental e finit per un comparison instructiv inter ti lingue e Esperanto. -- In li secuent discussion partiprendet pluri Esperantistes. Ili parlat pri li grand diffusion de Esperanto e su facilitá, specialmen por li laboreros etc. Durant li subrisiones del neutral publica un esperantist mem dit, que «bestaro» e «kreskajaro» esset plu bon quam «fauna» e «flora», queles mani persones ne posse comprender! Ma pluri esperantistes precipue attaccat sr Ahlström personalmen, e fat infam insinuationes que il vell haver altri motives quam conviction por su adherentie a Occidental etc, e in un tal maniere que li publica esset tre chocat. On posse comprender, que li esperantistes esset posit extra li equilibrie, quande un de lor ancian studie-ductores hat adheret a Occidental, ma sr Ahlström esset in plen jure, quande il protestat contra tal inhonest metodes e dat al max odios antagonist li consilie leer un instructiv libre pri honest manieres in li relation inter homes. -- Anc li representant de Interlingua, Lector V. Bladin, partiprendet in li discussion. Per un sympatic e cultivat oration, quel contrastat completmen a tis del esperantistes, il parlat in objectiv maniere pri li via del naturalism. Il esset un adherent de Interlingua, ma concedet que ti lingue ne esset sufficient developat. -- Pos li discussion li esperantistes proposit un resolution a favor de Esperanto, quo evocat grand exasperation che li membres del arrangeant loge e esset refusat con grand majorité. -- Un prova pri li sympatie por Occidental sr Ahlström recivet in form de un invitation dar un nov discours che altri loge. Tamen li ductores e altri membres expresset un desira que null discussion va evenir ye ti occasion, almen ne con li esperantistes. -- Sin dúbita li esperantistes noce su propri moventie che li neutral publica per su fanatism. C. E. S.

Senior Karl JANOTTA, secunte un invitation de Vdöl (VEREIN DEUTSCHÖESTERREICHISCHER INGENIEURE, i. e. Societé de german-austrian ingenieros), li 7 marte in li grand sala del Histologic Institut del Universitate Wien, fat un public discours pri li tema «Occidental quam nov lingue de

communication». Li discours esset inaugurat per li president del Vdöl, Ing. Emil JUNG, qui explicat que anc li tema Lingue e Scriptura appartene al dominias limitari del technica e al metatechnic problemas. Ne existe un contrast: ci technica, ta vive; ci technica, ta cultura etc. nam li technica es un function del vive, un part del cultura. Li technico unesimli judica li lingue quam instrument de intercomprension e su rendiment (coefficient de effect) es taxat anc de ti punctu de vise. — Poy sr Janotta fat su discours special por Occidental, origine e structura de Occidental, comparison inter Esperanto e Occidental, li synthese de latin e angles per Occidental, judicies del Liga de Naciones e del Linguistica, possibilitá del immediat usabilitá general de Occidental in scientie e industrie. — In li discussion prendet parte quele conosset esperantistes, inter ili sr Raimund Čech, (president del vigli Esperanto-societé Danubio) e Dr. Emil Pfeffer (redactor del Esperanto-fako de Tagblatt-Bibliothek). On deve sublinear que generalmen esset remarcabil que li nivell del discussion esset plu alt quam ante annus, alor li polemicas fratricid Esperanto-Ido. — Ing. Richard HARTMANN, chef del officie por technic traductiones in li Union General del Austrian Industrie, declara que il es ne esperantist ni un altri ist, ma per su polyglottic experienties il deve declarar que Occidental merite li palme inter li tal-nominat lingues international; it es ti clave-lingue quel noi sercha in li caos de multilinguitá, p. ex. in li industrie de Sudamerica, e quel noi posse e va introducter totalmen tranquil, sin sucusses e sin proclamations. Nu pos li fanfares de Esperanto lass nos laborar utilmen por li lingue international e per it. — Li esperantistes presentat bon oratores, hant parlat con verve e rutine mem in comprensibil Esperanto. Tamen solmen li discussores por Occidental recoltat li applause del publica non-partisan, pro disponer pri un ancor plu rich experientie in li materie e versatilitá dialectic e ante omni-cos pro defender un modern fascinant lingue comprensibil sin artificies e li immens advantages de quel esset battent in oculus ex li images projectiv. E. P.

SVISSIA nu apparì sub titul HELVETIA, por evitar inconvenient confusion inter li nómine del land e del jurnal. Nr 8, 9 contene polemica con idistes, li question del accusative, responses a circulare de Celia (queles apartene in li circulares de Celia, ne in un folie leet anc de comensantes, incompetent pri linguistic questiones), li scientistes contra li scientie (cu-

rios episodes ex li historie del progress cultural), rapport del redaction (quel nu es occupat per composir un sat complet dictionarium frances-Occidental), interlinguistic reminiscencies de Prof. A. Levanzin (Malta) con interessant exposition historic del lingue maltes, li punctus sur lis i (ili ne existet in li roman scrition e esset introductet in li epoca quande on adoptet li scrition gotic quel havet uniformi gambes por pluri litteres: u, m, n. Pro que li i posset far confusion, on indicat it per un accentu, quel devenit un punctu in li 16esim secul). Li jurnal have contenete interessant e amusant e fa progresses in plu correct presentation del lingue.

HELVETIA communica que it just editet un german brochure por li propaganda de Occidental, intitulat DIE MODERNE WELTSPRACHE, composit de Dr. Schrag (inspector de scoles secundari, autor del max usat libre de aprension por Ido), e de Dr. Aschwanden e Dr. Nidecker. Li 24 paginal caderne in format de Helvetia custa 0.50 sviss fr. (0.70 öS) che Occidental-Buro Chapelle (Vd.) Svissia.

DER FREMDSPRACHLER (revue por cultivation de vivent lingues), Berlin, marte, contene un recension de Cosmoglotta, quel comensa in german e fini in Occidental, laudante que Occidental, in contrast a Esperanto, Ido etc, max strettmen possibil apoya se al natural formes del vivent lingues. Un altri articul in li sam caderne anc occupa se pri li essentie de Occidental e sublinea su immediat comprensibilitá e su cultural valore quam Democratic Latin. E. P.

In FOLKSKOLLARARNAS TIDNING (jurnal del primari scol-preceptores) nor coidealist senior E. Berggren ha participat un discussion pri li mundlingual question tra pluri numeros. On posset observar, que li esperantistes ne esset capabil refutar li grav objectiones fat contra lor lingue, lor sol argument esset li grand diffusion de esperanto.

Li sved calendarium NYKTERHETSFOLKETS KALENDER 1929 contene un articul de senior C. E. Sjöstedt sub titul «Li du directiones principal del mundlingual movement», tractant li principies del mechanistic e del naturalistic projectes. — Ti articul es reproductet del jurnal SKANSKA DAGBLADET. Malmö. C. E. S.

ŠKOLA MĚŠTANSKÁ (Scole civil), jurnal de tchec fac-instructores, in nr 12 e 13 publica noticias de sr Jaroslav Podobský (fac-instructor in Bakov nad Jizerou) pri li nov annu

de Cosmoglotta con indication de contene e recommendation a letura, adplu mention de tchee publicationes pri Occidental e un curt textu exemplari.

MURTALER ZEITUNG, Judenburg (Austria), 2 marte, publica un articul propagativ por Occidental, con textus comparativ, de nor collaborator sr Heinrich Gäminger.

REVALER BOTE, 17, 1., recense in sympatic maniere Cosmoglotta e da un texte de Occidental. -i-

Sr Ch. PAUL, professor de scienties in li collegie de Lesneven (Finistère), Francia, ex-esperantist e ex-delegat idist, adheret a Occ.

Seniora Instructora COLAS visitat li OCCIDENTAL-BURO de Paris e un vez plu esset evident li facilitá de parlacion de nor lingue.

Sr de GUESNET visitat in Boulogne sur Mer li old mund-linguistic pionero sr Avocat MICHAUX, president del unesim congress de Esperanto, autor de Romanal, qui declarat que il es tre interessat del labores de Celia. L. M. G.

MONDO, «autonoma mondo-revuo por la mondo-linguo», Stockholm, nr 221—226. Ti revue, ex-organ del Ido-Academie, nu, «sin abandonar Ido, es consacrat a propaganda por Novial e a discussion pri su developation e perfection». Pro material obstacles it apari tre irregularimen: p. ex. li caderne de juli-august 1928 advenit ne ante li 22 januar 1929. In nr 221, nor collaborator A. Kofman (Odessa), exmembre de Ido-Akademio, publica un jolli articul «Esperanto e la dek perdita tribui di Israel», quel in su essentie es un interessant cultur-document e un apologie de Occidental. Regretabilmen li redactor in su polemica ancor ne ha cessat li sarcastic ton personal contra li autor de Occidental. Li inventor del lingue-project Federal, J. Barral (Berre-des-Alpes A.-M., Francia) notifica su adhesion a Novial. In nr 224 sr Dr. Auerbach comunica que li idistes sin equitá reprocha a Prof. Jespersen que il trublat li continuation del movement. Nam seniores Beaufront, Noetzli, Peus etc in li Ido-conferentie Paris 1927 refusat li propositiones del reformistes per declarar que ili va deliberar lor proposes ne ante que li propositores va har presentat un complet systema: «Prof. Jespersen vell mult preferet publicar solmen criticas pri quelc cardinal punctus, ma li attitude del conservatives ha coactet le presentar les in li cadre de un complet systema». E. P.

In li chef-articul in ESPERANTO, nr 340, intitulat «Nia alfabeto pravigita» (... Nor alfabeto justificat) Dr. Privat departiente ex li ortografic reforma in Turcia, quel nu ha introductet li latin litteres, vole persuader que li esperantic ortografie con li chapelisat litteres es justificat per presc sam significationes in li nov ture alfabeto quam in Esperanto. Il lauda li progressivistic turcos e characterisa li ortografie de angles e frances quam «la plej fuŝan imageblan». Adplu il scri: «Nor lingue ne vive por un o altri propaganda-periode. It vive e cresce por li tot homanité del futurité». To visa Occidental. Nu, si li europian popules va un die introducter un tal radical ortografic reforma in su lingues quam li turcos, it va esser natural que anc li lingue international va secuer ti reforma, ma til tande, noi pensa, noi have ancor sufficient témpor e prefere ne chocar li publica e destructer li etymologie, do li regularité e naturalité. Dr. Privat in li fine asserite que «noi ja ha trapasat ti epoca, quande li question del supersignes esset actual. It nu ja es soluet». Yo concede totalmen con ti opinion, e li adherentes de Occidental ne-quande ha luctat contra li idé e li application del supersignes in se self. Por exemple it es possibil que con témpore on va vicear li sovente criticat litteres n', l' per special types, forsan con un comma sub li litteres, simil al usat in rumanian e litovian lingues. Ma tut altri-cos es li elimination del duplic pronunciation del littere c, quel ne posse esser eliminat in un etymologimen clar e regulari e tamen natural e international lingue e it es sive tactic manovre sive impossibilitá mover li cerebre, si on ne concede que li desfacilitá del aprension de ti du divers pronunciations es por li max indotates un demi hor de aprension! Ma «vulgus vult decipi, ergo vivant deceptores!»

Ante quele tempore Dr. Edmond PRIVAT, li ductor del Esperanto-movement, ha festat li jubilé de 25 annus de activitá por Esperanto quam lingue international. On save que per su persistentie, prudent tactica, su charmant manieres il successat interessar mult institutiones, inter altri-cos anc li Liga de Naciones por Esperanto, e si li final resultates es relativemen insignificant con li enorm devoet activitá de ti chef-pionero, to vermen ne es su culp, ma ti del insufficientie del medie.

E. W.

Heroldo de Esperanto informa su letores que INTERNACIA RADIO-REVUO ha cessat apparir.

A. W.

Sr Dlouhý comunica me, que li 17 decembre 1928 ha morit nor coidealist sr Jos. F. KHUN instructor in Jičín, Tchecoslovacia, in età de 59 annus.

Sr Khun esset un fervent e devoet interlinguist del comensa del tchec Esperanto-movement. Ja in 1904 il editet per propri moné un bell ovre »Majstro Jan Hus« con prefacie de Dr Carlo Bourlet. In 1910 il editet su tchec traduction del brochura de Dr. Couturat »Pour la Langue Auxiliaire«.

Quam delegat de »Landal societé central del uniones de instructores in Bohemia« in »Internacia ofico por geinstruistaj federacioj«, in li unesim session del comité del »Ofico« il pledat in nómine de 8000 organisat tchec instructores por editer un propri propagatori jurnal in Esperanto. Su mandant esset anc inter li 230 societés adherent al »Delegation« til januar 1906.

Il ne esset content con li decision del Delegation pro fonetic considerations, ma pos mi explication il strax abandonat Esperanto e devenit ne minu fervent idist. Il esset li unesim president del »Cheka federuro dil amiki di la linguo internaciona«. In »Linguo Internaciona« 1912 il publicat su tchec traduction del studie de Dr Couturat »La Réforme Justifiée«. Por promover li propaganda de Ido inter li tchec instructores il publicat in un calendare de instructores 1913 su traduction de »Kurzer Lehrgang der Weltsprache Ido« de Fr. Schneeberger. In 1920 il adapta a Ido e edite su studie »Magistro Jan Hus«.

Durant mult annus il esset membre del »Direktanta Komitato dil Uniono por la L. I.« Interim il sempre contribue a »Linguo Internaciona« e scri articules propagativ por tchec gazettes e prende parte in li sessiones del Komitato dil Cheka Ido-federuro in Praha. Ti federation nominat le in 1923 quam membre honorari.

In li comensa de 1927 pos exchange de opinionen pri Occidental con me il abandonat Ido e devenit fervent occidentalist. Ma tande ja su sanità ne permisset le laborar por nor afere quam il desirat.

Ma ultra li grand labore por L. I. il laborat in li literatura por li infantes. Il collectet bellissim racontes por infantes in divers lingues e traductet les in tchec. Ancor in SaC 1927, pag. 60 il annuncia li continuation de ti penosi labore.

Sr Khun, un tchec Mezzofanti (il conosset almen 20 lingues europen), va restar in li memorie del tchec interlinguistes quam un devoet mann de aurin cordie.

Jan A. Kajš.

*

Nor coidealist H. SENIGALLIA, confundator e membre de Celia, morit in Marseille li 23 decembre 1928 in età de 43 annus. Unquande esperantist, il adheret a Ido in li comensa de ti ci movement e quande Occidental apparit, il misset sovent remarças pri Occidental e finalmen adheret a it. Malgré un grav e long maladie il interesset se sempre pri li progresses de Occidental. Su vidua e su infantes ples accepter nor sentimentes de condolentie.

L. M. de Guesnet.

LITTERATURA

Mi amic Kakut

Mi amic Kakut have tri maritas e il vive con omni tri in plenissim pace e felicie --- tut proxim al arctic zone. Kakut es eskimo de pur sangue, con età de circa 45 annus, grand de circa 5 pedes e 6 inches, presc tam larg quam long, have un tenebros visage brunat per li sole, enorm osses de guance e un litt mustache desordinat. Su dentes sembla esser for-limat til gengive, to es causat per que il macha li osses del renn por manjar li medull. Il es chief del forsan 30 families ex queles consiste li tot population de ti infertil region. Quam su contri-banes anc il vive completmen del savagi turbes de rennes.

Su «iglu» e «topek» (cabanes de nive e glacie) contene in-payabil tresores: un cofre garnit de latune, un perusat fono-graf, tri fusiles, instrumentes por carpentar e «last but not least» li vestiment estival de un hom alb, inclusiv de un pare de galoches. E naturalmen su tri feminas, un cose tre precios mem in li arctic zone.

Su marita nr 1, quem il maritat tre yun, have circa su età, fa un tre negligent impression e memora a un cigana de avan-sat età; ma in dom illa reye severmen e controlla li inmaga-sinament del victual'as e li perpetual serchada pro sicc bran-ches de salice por li foy. Li infantes de illa ja ha fundat propri families.

Marita nr 2 have circa 30 annus: su infantes lude ancor in li camp, ma ja sin controll. Su sol function es accompagner Ka-kut, partú u il ea, in chasse o in viage e cuidar por li tenda e li canes. Extra ti ci activitá illa sembla haver null altri quam fumar su propri pip o ti de un altri e sputar meditante in li foy.

Su marita nr 3 es apen 20 annus. Su sol charge es parturar infantes a Kakut. Illa deve esser sempre bell e pro to illa es sempre adornat. Quande yo videt la, illa hat vestit-se con un tut nov dupartit costum de pell de renn presc blanc tannat. Li pantalones trovat-se in alt bottles de cute savagin garnit per rubi flanell-cordelles. Li orle de su hirundi-caud robe esset bordurat de wolverino-peliss e de un serie de vacui cartuches. In li medie de su larg gilet pectoral de multicolor peliss-gar-nitur appendet un grand splendid ornament: yo reconosset it quam parte de un crocage por piscar, quel yo ha donat a Kakut in estive passat. Li capilles de illa plectet in du grass

saucisses, pendet a bass de ambi guances, e pluri larg anneles cuprin ornat chascun fingre.

Yes, illa aspectet bell, illa anc savet to e persistet esser fotografat tenente elevat ambi manus con li palmes ad avan ye ambi láteres del facie, porque ne mey forsan mancar li anneles in lí fotogramm. Kakut esset tre fier pri illa — in secret naturalmen. Il hat payat por illa 10 blanc-foxes, 2 usat canús, 1 nov fusil e 10 buxes de munition. Un astonant precie!

Quande in passat junio yo intrat in li camp de Kakut yo remarcet, que li familie Kakut ha finit su annual purification vernal; to es fat per transportar se-self e li tot havagies a un plazze quelc cent metres ad supra o a bass del fluvie. Si 20 homes con adminim tant canes ha hivernat circa 6 o 7 mensus sur un e sam plazze e vorat ta circa 500 rennes e deo save — quant piscs, e for-jettat li decadal'es chascun die apu lor camp in li profund nive, tande on fa bon changear su logiment in verne, quande li nive desgela; plu bentost plu bon.

Attendente mi visite, omnes esset reunit por salutar me, li tri feminas e quelc orfanos — nam Kakut have un bon cordie e ama tre mult un grand suita. Kakut self salutat me quam su gast. Su excitation manifestat-se in fluvies de sudore, queles fluet a bass del facie al coll.

Li proxim die noi continuat nor via al nord, Kakut sidet apu me e esset li guid. Mi ambi indianos e yo esset un poc derangeat per li sett-semanal viagie passat, durant que omni to quo Kakut portat, esset nov.

Kakut regardat mi ambi Cree-indianes quam entes inferior, quancam il esset tut amabil a ili. Ma il ne videt que il por ili secun lor rasse — rangeat inmediatmen detra li savages. Joyosmen il fat su parte del labor; vers me il conduit se quam un hósped qui monstra a su gast land e homes. Quande il decovrit que yo havet un libre por noticies, il con plesur pruntat it por esquissar cartes geografic del region circumdant nos, queles il commentat per litti rud dessines, quam p. ex. ti de un renn, de un musc, de salices e de piscs. Lu sol quo il ne savet far, esset representar li relationes de dimensiones; il esset acostumat a un cert scala, e si il devet dessinar 200 milies, il besonat folies e folies de paper, quo esset tre custos.

Quancam il participat a nor repastes e devorat enorm mult, tamen il credet, que noi damageat li frisc carne per bollir tro mult. Quam omni eskimos del land-partes interior il esset acostumat a carne gelat in hiverne e a carne «tepid» in estive.

Il manjat con plesur oves e conosset chascun insul u li anates in grand quantité deposit lor oves. Li partition de ti captage esset tre simplic, proque noi desirat solmen li frisc oves, durantque il preferet li altris. Por ti scope noi posit les in un caldron con aqua, e Kakut prendet li oves flottant sur li aqua, queles il sempre devorat in rud statu.

Su max remarcabil action esset li maniere parlar con me, regardante li fact que yo posse rememorar solmen 12 eskimo-paroles e il ne conosse plu quam 30 paroles angles, queles omnis il pronuncia sin diferentie con un dur finale. George esset «Joss», willow (salice): «willok», rifle (fusil) «riflek». Il nominat su infantes solmen «me baby», (quancam mani esset ja adult); pri su patre morit il parlat solmen quam de «me old buck» (mi old buc). Talmen il racontat li historie de un eskimo, qui chassat un renn, cargat it sur li slitt e marchat adhem, quande assaltat le un lup fat invalid per un captuore e a qui esset desfacil chassar besties. Li mann mispassuat e cadet, e pos un terribil lucta, li lup captet le al gurgul e strangulat le. Un eskimo observat li tot tragedie de un lontan collin per un telescop. Quande Kakut raportat me ti historie il finli rulat se quam in rabie sur terre, in comensa ululant quam un savagi lup, poy con li cordielacerant cria del victime.

Quande pos finition de nor excursion noi retornat in su camp il demandat de su marita nr 1 quam unesim un renno-lingue. Adiante il esset visibilmen emovet; yo es fort convictet que il comprendet me quande yo aclamat le: Bon fortun, amic Kakut!

Ex un articul de capitain Thierry Mallet, sénior-chef del firma pelisserial Révillon Frères in „The Atlantic Monthly“, Boston. Trad. Dr. Mell.

Cremation de prince sur Bali

In Ost-India li hollandeses ha abolit li antiqui cruel more del balineses, combuster li viduas del chefes e principes. In li annu 1814 on sacrificat in tal maniere ne minu quam 74 féminas a occasion del morte del raja. Li favoritas havet li tal-nòminat privilegie posser saltar vivi in li crepitant foy. Li concubinas e sclavas esset jettat quam cadavres in li foy pos lor pun'ation.

In li annu 1847 li dan viator Werner Helms assistet sur li insul Bali li martyrie de tri yun féminas qui talmen secuet lor raja in li morte.

Li cruel ceremonie evenit in li proxim vicinité del admirabil palace del morit chef e plu quam 40000 balineses inclusivmen li féminas prendet parte; omnis regardat ti ci spectacle quam un religiosi festa. Strett apu li palace trovat-se un altri splendid edificie, li aurin tegmente de quel esset supportat per alt pilastres de carmin colore. In su centre stat sur un petrin platform, covrit per sable, li grand richmen ornat statue de un leon, li dorsal làtere de quel on posset aperter, por acceptar li corpore del principe, qui junt con li statue devet esser dat al flammes. Adjacent al duésim palace esset un grand piazza, circumdat per un mur de quar pedes in altore. Intern de ti ci piazza brulat un colossal foy, quel esset destinat por li tri viduas del chef. Li spectatores collectet-se circum ti ci loc de cremation. Un bambù-ponte de 20 pedes de altore, quel esset protectet contra li foy per branches de platane, ductet a supra trans li piazza. In medie del pont trovat-se por li tri féminas un micri pavillon, in quel ili posset preparar-se por li salta mortal.

Li cadavre del prince, velopat in blanc toal'e, reposat sur li tabul de un alt, abundantmen decorat turre, quel havet li form de un pagode. In li solemni procession de 500 mannes, queles esset accompaniat de dignitarios, prestres, musicantes e numerosi portatores de preciosi dones de sacrificie samnen del manjage, preparat sur argentin e aurin platiles, li cadavre esset portat al piazza de cremation. Detra li grand turre tri plu micri, minu richmen decorat turres secuet in li procession; in chascun esset un del infelici yun féminas, li trates de queles tamen desvelat null timore pro li menaciant horribil morte. Per auxilie de un spegul e péctine ili fe ornar-se por li marcha al sacrificie, quel li balineses nòmina «bela» i. e. «fidel til morte». Pos to li cadavre del raja esset dat al flammes e numerosi spegules sur li bell mures del crematoria, supportat de colonnes, reflectet li flammeant mar del brulant leon lignin.

Poy secuet li atroci scen, quel esset regardat del spectatores sin li minim horrore. On portat li tri yun féminas in medie del procession tri-vez circum li piazza e pos to on conductet les al ponte, ù ili attendet in li pavillon de ponte, til que venit lor vez. Quande ti ci moment hat arrivat, ili eat per tranquil passus al fine del pont, portante tri columbas sur lor manus. Li avies volat ad supra, quande li féminas fat li fatal passu, talmen incorporante li symbol del ánima liberat. Null anxie monstrat-se sur li trates del féminas, quande ili, stant sur li

fine del ponte — 20 pedes super un furiosi mar de flammes. plu fortinen adsoflat per grand quantes de oleo — omni tri levat lor manus super li capes. Du de ili regardat un altru, li silent signal: Tu es pret?

Poy ili saltat in li voraci foy. Li triésim hesitat un moment, ma poy illa secuet al du altris. Null cri escapat lor labies, quande li flammes cludet muiet super ili. Ti ci horribil spectacle semblat causar null emotion inter li spectatores. Solmen li un european test esset rigidat pro terrore e scrit plu tard pri to: «Quo yo videt, es inobliviabil. It plenat mi cordie con profund mersiosità, appartener a un civilisation quel malgré omni su mancas tamen conosse misericordie e quel plu e plu protecte li féminas contra oppression e crueltàs. Li brites ha exterminat in India li more del sacrificies de hom e sin dúbita li hollandeses interim attin'et lu sam anc sur Bali.»

Felicimen on posse afirmar to, li hollandeses ha despermisset li barbaric more del sacrificies de féminas. Ma to es anc li sol mutation, quel ha esset fat che li pomposi interrument de un balinesi principe. Ancor hodie li cremation es un grand eveniment, besonant preparationes de quele mensus. Ancor hodie on inscena un luxuosi procession funeral, in quel li morto es portat de centes de portatores in un pagode — anc li altri customes conservat-se, etsi hodie li yun viduas ne plu secue li raja in li morte: grand pupes de pal'e, velopat in preciosi vestimentes, symbolisa li féminas, proque tis ci self es impedit del nov mastros del lande, li hollandeses, accompan'ar lor marito in li ciel de Indra e li campos de etern felicie.

Dr. H. H. Juyneboll in "De Indische Gids".

Trad. de Dr. K. Schüppel.

Fá sam quam li postmann!

Es-que tu ja pensat ye li quantitá de canes queles li postmann incontra durant su distribution-tur?

Si il vell dever stoppar omnivez quande un de ili aboya detra su talones, il vell nequande posser finir su labor.

Ma il lassa, con indifferentie, li canes clamar lor colere, e il secue su via, sin esser trublat.

Imita le! Tu fat melior hodie quam yer. It es li cause de tant invidie, jalousie e calumnia. Ne honora per un response tis qui aboya detra vor talones.

In ceteri tu ne have tempore a perder por to. *Trad. L. M. G.*

CORRESPONDENTIE

Nor collaborator sr L. M. de Guesnet (Paris) invia nos li secuent opinion expresset e autorisat de Prof. A. MEILLET, professor de linguistica in Collège de France:

«To quo es ja international, deve esser adoptet in li lingue international e it ne deve depender de alcun sentiment personal que on changea o substitue in it alcun altri cose».

*

Al redaction del jurnal Cosmoglotta, Mauer bei Wien.

Tre estimat seniores.

Ples permissar me mersiar per vor estimat jurnal a omni ti mund-linguistes qui enunciat se al vesper memorativ arangeat de F. de Wahl in ocasion del 10esim anniversarie del morte de mi patre. It es por me doloros, que Reform-Neutral esset sepultet con mi patre, quancam it ha havet mult adherentes durant su vive. Yo ne es sufficient versat in linguistica por laborar e defender Reform-Neutral; anc manca me li tot materiale, pro que yo posset salvar ex li caos del bolshevistic regime ne mem li mund-linguistic biblioteca e correspondentie tam rich de mi patre. Ma por maner fidel e servir al idé, por quel mi patre laborat tam entusiasticmen, yo adhere al Occidental-movement e peti vos considerar me quam membre e abonnat de Cosmoglotta. Con excellent respecte

Helene Terras-Rosenberger.

Nömme bei Reval, Waldeckerstr. 3, Estonia.

*

Li letores queles possede li LEXICO DEUTSCH-OCCIDENTAL e desira receiver li appendic con print-erras e supplementes, mey demandar it de Kosmoglott, Reval, Eha 10, Estonia, e adjunter un respons-cupon o 10 Pf. in german postmarcas por li postal expenses. Ta on posse comendar anc li altri editiones de Kosmoglott, insertet in nr 58, pg. 60.

E. W.

*

Pro li esquisse fat por li covriment de Cosmoglotta yo ha recivet pluri gratulationes de letores de divers landes. Ne possente mersiar per manu propri a chascun amical scrite yo permisse me far to per li present maniere. Yo considera it quam mi simplic deventie auxiliar a un movement cultural homanitari e joya audir, que li occidentalistes es content pri li dessin.

Alfred Hoerbiger.

*

Con regret noi deve sempre denove constatar que it es impossibil assecurar un regulari admission de Cosmoglotta por multes de nor max interessat letores in RUSSIA. Divers russ coidealistes absolutmen ne receive li revue, altres solmen sporadic. Mem li missages comendat de membres del Academie Sovetic del Scienties ne es immun

contra confiscationes. P. ex. un pacca de jurnales comendat de un professor de Universitate in Leningrad e inviat registrat esset ne inmanat al destinario ni retro a nos. Solmen pos tedant reclamationes e revendicationes del austrian posta noi retro-recivet li pacca con stamp in lingue frances «Interdit por admission per li administration postal». Noi ne comprende un tal interdiction por un revue quel independent de political tendenties, impartialmen es consacrat al diffusion de un lingue international destinat por omni popules. O esque li «administration postal» de USSR have li conception, conform al inscriptiones sur su marcas e cartes official, que Esperanto have li monopol de un L. I. e que li concurrentie de Occidental es «interdit»? Noi fa ti communication public, pro que li procedentie del nominat «administration postal» causa nos grand expenses e constant incommoditas e por que nor russ letores save li motives quande noi deve totalmen cessar nor expedition a USSR. Adm.

Lettre apert

a Professor Paolo Lusana,
President del Ido-Akademio,
Biella (Italia).

Estimat senior.

Noi remarecat, que senior Noetzli, redactor de «Ido», plena pluri págines del «Ofical Informilo» del Ido-Akademio con crud personal insultas e offensiv insinuationes contra Senior Moore, Professor Jespersen, Mrs. Morris e altri conosset interlinguistes. — Li attacas es tam absurd, fantastic e infantesc, que noi self ne vide necessitá a responder, ma noi desira saver es-que un tal metode de interlinguistic discussien e procedentie have li sympatie e approbation de vu, senior Professor, quam president, e del altri membres del Ido-Akademio.

Con respectosi salutationes

Occidental-Union

Central Officie

A. Deminger

E. Pigal

Subventiones al Occidental-Union

Regierungsrat Dr. Mell (Rudolstadt): 25 öS.

O. Calmark-Zlamalyk (Chicago): 30 öS.

H. Dave Morris (New York): 4 doll.

Dr. Karl Schüppel (Parchim): 8,2 RM.

Gerald A. Moore (London): 25 pounds sterling.

Heinrich Hruby (Wien): 3 öS.

Li Central Officie.

Eigentümer, Herausgeber und Verleger: Occidental-Union, Sitz: Mauer bei Wien.
Verantwortl. Schriftleiter: Ing. E. Pigal, Liesing b. Wien. Druck: Milan Nedvidek, Tábor.